



Parlamentarna komisija odgovorna za reviziju
Parlamentarno povjerenstvo odgovorno za reviziju

Парламентарна комисија одговорна за ревизију

Broj: 04/1-02-1330/25-3
Sarajevo, 26. 6. 2025. godine

ČLANOVIMA PARLAMENTARNE KOMISIJE ODGOVORNE ZA REVIZIJU

Dana 25. 6. 2025. godine održana je 18. sjednica Parlamentarne komisije odgovorne za reviziju Parlamenta Federacije BiH (u daljem tekstu: Komisija). Sjednici Komisije prisustvovalo je 12 od ukupno 14 članova Komisije i samim tim ispunjeni su svi uslovi za punovažan rad u pogledu kvoruma i odlučivanja. Pored članova Komisije, na 18. sjednici prisutan je bio i Mirza Kudić, generalni revizor Ureda za reviziju institucija u Federaciji BiH.

Zamjenik predsjednik Komisije je predložio **dnevni red**, koji je jednoglasno usvojen, a koji glasi:

1. Usvajanje zapisnika sa 17. sjednice Parlamentarne komisije odgovorne za reviziju,
2. Obrazac programa aktivnosti na implementaciji preporuka/plan implementacije preostalih preporuka sa rokovima i odgovornim osobama datih u finansijskoj reviziji od strane Ureda za reviziju institucija u Federaciji BiH,
3. Pregled pristiglih izvještaja Ureda za reviziju institucija u Federaciji BiH za 2024. godinu,
4. Informacija o pristiglim odgovorima revidiranih subjekata dostavljenih po Izvještaju Parlamentarne komisije odgovorne za reviziju o revizorskim izvještajima revidiranih subjekata i korisnika Budžeta Federacije Bosne i Hercegovine za 2021., 2022. i 2023. godinu,
5. Tekuća pitanja.

Na osnovu člana 44. Poslovnika Predstavničkog doma i člana 41. Poslovnika o radu Doma naroda, a u vezi sa članom 54. Poslovnika Predstavničkog doma Parlamenta i člana 52. Poslovnika o radu Doma naroda Parlamenta Federacije BiH, Komisija podnosi sljedeći:

IZVJEŠTAJ

1. Usvajanje zapisnika s 17. sjednice Parlamentarne komisije odgovorne za reviziju

Komisija je razmatrala zapisnik s 17. sjednice Parlamentarne komisije odgovorne za reviziju i jednoglasno ga usvojila.

2. Obrazac programa aktivnosti na implementaciji preporuka/plan implementacije preostalih preporuka sa rokovima i odgovornim osobama datih u finansijskoj reviziji od strane Ureda za reviziju institucija u Federaciji BiH

Zamjenik predsjednika Komisije je podsjetio članove Komisije da su na prethodnoj sjednici usvojili Zaključak kojim sekretara Komisije obavezuju da za narednu sjednicu dostavi prijedlog obrasca za dostavljanje odgovora revidiranih subjekata Komisiji o poduzetim aktivnostima po datim preporukama Ureda za reviziju institucija u Federaciji BiH, koji će se nakon usvajanja uz dopis dostaviti revidiranim subjektima.

Prijedlog obrasca je pripremljen i dostavljen članovima zajedno sa pozivom za 18. sjednicu Komisije.

Predsjednik komisije je pozvao Mirzu Kudića, generalnog revizora Ureda za reviziju institucija u Federaciji BiH, da članovima komisije obrazloži sadržaj prijedloga obrasca. On je istakao da je cilj predlaganja unificiranog obrasca bio obezbjeđivanje jednoobraznih i preglednijih odgovora revidiranih subjekata, čime bi se omogućila efikasnija analiza stepena realizacije preporuka, lakše praćenje napretka u implementaciji, kao i jasno ukazalo na odgovorna lica unutar revidiranih subjekata

Generalni revizor je posebno naglasio da su određeni rokovi za dostavu odgovora, koji su prvobitno navedeni u Izvještaju Komisije, već djelimično istekli, budući da se čekalo usvajanje Izvještaja u domovima Parlamenta Federacije BiH. Taj aspekt, kako je sugerirao, treba imati u vidu prilikom evaluacije trenutnog stanja i daljih koraka u vezi s realizacijom preporuka.

Na prijedlog zamjenik predsjednika Komisije članovi komisije su jednoglasno usvojili sljedeći:

ZAKLJUČAK

Parlamentarna komisija odgovorna za reviziju usvaja Obrazac programa aktivnosti na implementaciji preporuka/plan implementacije preostalih preporuka sa rokovima i odgovornim osobama datih u finansijskoj reviziji od strane Ureda za reviziju institucija u Federaciji BiH.

3. Pregled pristiglih izvještaja Ureda za reviziju u Federaciji BiH za 2024. godinu

Zamjenik predsjednika Komisije je informirao članove Komisije da im je putem elektronske pošte sa ostalim materijalima za 18. sjednicu Komisije dostavljen tabelarni prikaz pristiglih izvještaja Ureda za reviziju institucija u Federaciji BiH za 2024. godinu, koji sadrži pregled ključnih podataka o reviziji revidiranih subjekata.

Iz dostavljenog prikaza je vidljivo da se radi o devetnaest izvještaja, te da je svaki od revidiranih subjekata dobio pozitivno mišljenje u kontekstu finansijske revizije.

Međutim, naglasio je da je 10 revidiranih subjekata dobilo mišljenje s rezervom u pogledu usklađenosti sa propisima.

Predsjednik komisije je pozvao Mirzu Kudića, generalnog revizora Ureda za reviziju institucija u Federaciji BiH, da obrazloži ovu tačku dnevnog reda.

On je informirao članove da su kvalifikovana mišljenja u pogledu usklađenosti sa propisima za pomenute revidirane subjekte posljedica prvenstveno neregularnosti u izvršavanju poslova iz njihove nadležnosti, zatim transfera novca i načina na koji se transferi vrše, poslovi provođenja javnih nabavki i slično. Naglasio je da postoji širok dijapazon kršenja usklađenosti, sa različitim stepenima odgovornosti, ali istovremno je evidentan trud i napredak revidiranih subjekata u nastojanjima da otklone ove neregularnosti.

Istakao je da se Ured za reviziju institucija u Federaciji BiH bazirao na preporuke koje revidirani subjekti realno mogu da ispune odnosno koje su u njihovoj nadležnosti.

Generalni revizor je predložio članovima komisije da što prije otpočnu sa saslušanjem pristiglih izvještaja budžetskih korisnika, kako bi prilikom odlučivanja o budžetu imali pravovremen i cjelovit uvid u njihova stanja, te blagovremeno reagovali, bilo pozitivno ili negativno.

Na prijedlog zamjenik predsjednika Komisije, članovi komisije su jednoglasno usvojili sljedeći:

ZAKLJUČAK

Parlamentarna komisija odgovorna za reviziju će početkom septembra 2025. godine utvrditi plan i dinamiku javnih saslušanja revidiranih subjekata.

4. Informacija o pristiglim odgovorima revidiranih subjekata dostavljenih po Izvještaju Parlamentarne komisije odgovorne za reviziju o revizorskim izvještajima revidiranih subjekata i korisnika Budžeta Federacije Bosne i Hercegovine za 2021., 2022. i 2023. godinu

Zamjenik predsjednika Komisije je je informirao članove Komisije da je šest revidiranih subjekata dostavilo planove provedbe preostalih preporuka po Izvještaju Parlamentarne komisije odgovorne za reviziju o revizorskim izvještajima revidiranih subjekata i korisnika Budžeta Federacije Bosne i Hercegovine za 2021., 2022. i 2023. godinu, i to:

1. Agencija za vodno područje Jadranskog mora, dostavljen 16.05.2025. godine,
2. Hrvatska pošta Mostar, dostavljen 02.06.2025. godine,
3. Porezna uprava FBiH, dostavljen 03.06.2025. godine,
4. Rudnik mrkog uglja „Breza“ d.o.o Breza, dostavljen 05.06.2025. godine,
5. Fond za profesionalnu rehabilitaciju i zapošljavanje osoba sa invaliditetom, dostavljen 12.06.2025. godine.

Zamjenik predsjednika Komisije je dao riječ Mirzi Kudić, generalnom revizoru Ureda za reviziju institucija u Federaciji BiH.

On je naglasio da je riječ o preporukama koje su date u 2021., 2022. i 2023. godini, te su preporuke i nalazi sadržani u izvještajima uglavnom zastarjeli. Istakao je da će Ured za reviziju institucija u Federaciji BiH svakako pratiti planove realizacije za one preporuke koje su i dalje aktuelne.

5. Tekuća pitanja

Zamjenik predsjednika Komisije je podsjetio članove da je usvajanje Izvještaja Parlamentarne komisije odgovorne za reviziju o revizorskim izvještajima revidiranih subjekata i korisnika Budžeta Federacije Bosne i Hercegovine za 2021., 2022. i 2023. godinu u Domu naroda Parlamenta Federacije BiH proteklo uz određene nepredviđene komplikacije.

Istakao je da Parlamentarna komisija odgovorna za reviziju u svom članstvu ima pripadnike svih političkih stranaka, te da su zajedničkim radom utvrdili i usvojili prijedlog ovog Izvještaja.

Međutim, prilikom elektronskog glasanja u Domu naroda Parlamenta Federacije BiH ovaj Izvještaj nije dobio potrebnu većinu, i tek prilikom pojedinačnog glasanja je isti usvojen.

Usvajanjem Izvještaja Parlamentarna komisija odgovorna za reviziju je ispunila svoju obavezu iz prethodnog perioda, a u sljedećem ciklusu će, shodno Zaključku iz tačke 3.

dnevnog reda ove sjednice, pristupiti poslovima organiziranju i sprovođenju javnih saslušanja revidiranih subjekata za 2024. godinu, te drugih poslova iz svoje nadležnosti.



**ZAMJENIK PREDSJEDNIKA
PARLAMENTARNE KOMISIJE
ODGOVORNE ZA REVIZIJU**

Damir Džeba, v.r



**PREDSJEDNIK
PARLAMENTARNE KOMISIJE
ODGOVORNE ZA REVIZIJU**

Elvir Karabibić, s.r.